

摘藻堂四庫全書薈要

集部

欽定四庫全書薈要

集部

秋澗集

卷四十九

五十九

詳校官助教臣謝登雋



欽定四庫全書薈要卷一萬六千二百五


集部

秋澗集卷四十九

元 王惲 撰

傳

蘇門林氏家傳


林氏其先兗州曲阜人唐之季世有官于閩中者後復徙家于文登至遠祖府君名翰者蓋五世矣翰在宋初用貴贈率府率子諱文受知熙陵官至崇儀副使淮南路提撫刑獄贈領軍衛將軍生子永終屯田

員外郎御史臺推直官累階贈光祿卿永生子之純
字嘉父擢景祐五年進士第釋褐主朝城簿河東犯
橫隴瀕於不支歸兵恟恟欲亡去公安諭之遂怙然
事集升知莘縣以屏盜有方受澶州頓丘令未幾恩
信大行時麥黃水盛下噬孫陳岸勢危甚公朝服立
潰堤上望濤頭拜禱波神為霽威境賴以安改佐著
作淮陽軍事判官貳徐惠劾紀著叛獄有匿其家者
註誤殊衆公為辦理多致原釋郊禮覃慶加太常博

士知大名縣初天王院五代時有韓王賜田甚廣歲久失據鄰伍以僧妄冒致訟累寒暑不能決公按索隣券考明封畔繼得古石記與所按吻合以田付僧令歲輸常賦民乃稱服用丞相程公薦通判青州終得年四十有九官至職方員外郎上騎都尉仍賜五品命服娶呂氏封京兆縣君惠和宜家之純生三子長曰舍字虛白年十九擢熙寧進士第性恬退以高節自信嘗有詩云世有非常樂人無未老閑未三十以大理評事休官名

賢高其行至方之淵明初先生西遊共城愛其山水明
秀迺營葬青州府君於縣西處賢鄉古郭里母夫人呂
氏祔焉自是林氏為衛之蘇門人先生四子曰愚曰恕
曰憇曰恣愚字貢元亦以節行稱宋亡至焚香告誓不
仕而終仲弟介鄉貢進士季弟會字貫道幼知嗜書剛
正有志操由蔭補郊社齋郎初主成都雙流縣簿令久
闕攝公行縣事有能聲部內舊有湮歲例役並水民莛
治貧下苦之公乃一責資漑家理辦仍捷石代工衆免

告勞頻歲大稔調宿州司理叅軍暮夜民遺火延燒狂
屋公出繫散置庭中比熄倉卒際無越逸者上官材之
移南京軍巡判官民有戕其子執謀害人者按竟公至
疑焉求情得白遂直其枉改新蔡令歲大蝗獨不入縣
境人謂公廉平所致由韋城宰歷奉符縣秩滿授通直
郎知蘇州常熟縣兩浙頻年大水引漑浦口湮閼無慮
三十餘所累政謾不加省公按行故瀆率疏淪之民受
賜不貲元祐庚辰疾終蘇之公館配張氏有淑德駕部

員外郎赤之女封壽安縣君生子男四人聽通直郎西

京敦宗院博士聰總隱皆業進士自羈貫至成人太孺

陰教為居多聽生子五人曰巽允蒙鼎革巽次子諱正

國字德將登金大定十六年進士第終少中大夫北京

監使生懷遠大將軍毗陽丞諱茂字漢卿懷遠二子曰

思敬鄉貢進士曰思德潁川軍仗廬使生子芳今任江

南某府從事思敬府君之子即故衛州交鈔規措大使

諱通字子泉為人丰儀修整顏渥丹鼻隆然如膽垂寡

言笑善心計顧衛南北衝會貨財四通遂積殖與時逐
然坐籌能擇人而任故物情得而掇世資生平喜賓客
樂施予其克勤躬儉殆憂深思遠者屢以其術事上官
獲精幹稱嘗訓子珪曰林氏上世以詩禮傳家代有聞
人予惟早失怙恃生長喪亂間以餬口計處四民末業
致貽祖禰羞諸孫稍長無忘讀書以復世範汝念茲無
置府君以丙辰歲終魚行里之私居壽六十三配宣氏
衛之大家主治內務寬儉有母儀燕處榮養期頤而終

享年八十有三人以全福歸之子珪以孝義著稱能世其父業曾任州三務大使次子璋謹愿克家珪子永大名府平準庫使次子元珪奉遵先訓俾之從學其資藉啓迪乃心罔不盡不數年起家為中書掾至元丁丑予列職太史元來謁拜而請曰元無所肖似析薪之責固不克負荷惟是先世行業非得名筆約而暢之將不能傳遠而人見於後先生尚胥暨顧予以林世叙雖邈其聞而知之見而知之者班班可紀加以世姻之好故勉為

傳述之贊曰

林氏本出商姓太丁子比干以忠諫死嗣堅逃難長林
山易以定氏周衰枝葉扶蘇散處中國如放之聞於魯
顏之顯於齊回以義著至以相名皆其後也緊南安之
林唐已來世為魯人豈放之苗裔耶迨唐歷宋金四百
餘載間奕葉以儒顯其流風善政表表于時者如是迨
規措府君遭時艱虞家世中衰竟能適追來孝俾盛德
幽光墜而復續豈君子之澤其流淵且長乎

南鄒王氏家傳

王氏皆王者之後春秋時王子成父者敗敵有功因賜氏厥後子孫散落中國在晉者靈王太子後齊則畢公高後其在陳留者齊王和之裔汲郡王氏其先陳留陽武縣七圉里人起家隴畝耕稼河陂間宋靖康初避地徙家衛汲縣長樂鄉之白楊里遠祖金天會間積勞至杞縣尉高祖兄弟五人二翁者是為扈王氏初妣父扈素長者聞高祖賢舍而甥焉生子男五曰三翁四翁五

翁十五翁十六翁人見其本支蕃衍稱扈王氏以別因之蓋不忘本也三翁贊譜叙為二代祖生二子曰元用資穎異是為惲高祖自田舍郎改肄士業嘗語人曰終當以筆代耕衆異其言及長補郡掾為人英特棣棣有威儀主治曹務踔勅角切厲風發明昌初節鎮叅佐例朝授用薦者言遷河平軍都日官上官倚重有黑王殿直立節度之目尋得暴疾卒魚行里舍時年三十有八人惜其年不稱德生經紀紳三子紀為決曹紳潛德不耀

曾祖經字伯常天稟孝愛垂髫已知事母容止如成人
禮氣方嚴內長厚喜施與志不樂祿仕雍容鄉閭以德
度霽一時昆仲七人同居內外無間言以累葉不分家
用饒足其賑貧施乏不掩為偏惠人有貸弗忍徵久不
克償輒折其券或來謝就復惠濟曰周急素所樂何謝
為一世家子要紫大條來取所附

闕

與

徐誠之曰農當務實士君子帶非

闕

送其

家女弟嫁陵氏壻下以俠犯

闕

女妹先

君所鍾愛若壻置於辟婦

闕

容匿會赦

嘗出郭門遇里農易

闕

也墮焉取諸

市可乎其人謝而去其黨

闕

官府來求剖正

為諭之曰遠親莫

闕

世所未免親仁和

隣古之善道初無

闕

君子愛人以德曲直

非所辯曰吾儕小人

闕

不易慮至相戒曰今而

後不可使長若

闕

其為一邦聽直欽服如此

王氏北

闕

者尚十餘房其親喪隨所寓

權厝曾之晉村之南阜曾慮歷年久命封馬鬣漫不可

識嘆曰吾大宗子合食族墓責實在我遂起新阡大葬
於長樂鄉第四疇祖業之北原及舉祀絕者廿餘柩贈
賻率有加凡內外男女孤惻無藉賴者為娶嫁之姻禮
踰已出曾祖妣系出新中臨清關宋汲郡公呂氏之裔
壺儀母德宗屬仰法焉生與曾祖歲月日同北兵破衛
亦同時怖沒於家春秋七十有六實貞祐二年甲戌春
正月十一日也百年來里中宿耆談孝愛而內有則者

必曾為稱首生祖宇宇彥宇身長七尺二寸儀觀清淑
少傳家學尤明習文法至帖問條對義精理當筆洒洒
無滯辭行輩無居其右者甫冠遭罹板蕩世業為一空
奮身從事卒不失舊物雅為節度公完顏從坦所知遇
由郡掾辟刑曹孔目官祖盡心庶獄要本情與法應未
嘗用察為明情得為喜也故郡中稱平至有哀矜折獄
之譽類注刑統進祿等書既而嘆曰後世知我罪我其
此書乎生平樂誨人怡顏和氣不以己長格物雖童孺

質問諄諄然無倦色有弗知未始不盡也今梁衛間由吏業而上達者半為門生遂以吏學授先君曰吾治獄平後當有顯者然前賢有言吏以法令為師問而可知其能與否自有資才非學而可此汝最當默識弟完之子鈞早失怙恃鞠育與先君等至一豆羹一裘褐必加顧恤正大改元四月十六日以未疾終新衛州橫堤里之寓館壽五十有一官至敦武校尉祖妣孟氏女縣南草市榆林坊富家姿貞順配祖德良稱既誕先考以貞

祐二年癸酉四月十六日卒於郡之故家再娶韓氏韓
宋已來世顯族有累階至司空龍圖者二十九處寡以
儉烈聞流寓勤苦保持門戶甚力俾先君卓爾早達祖
妣資藉之方為多晚嗜道家教號妙清大元中統庚申
重九日以疾終安仁里享年七十有六越三日祔葬玄
堂祖柩之左先君諱天鐸字振之姿精敏幼知嗜學諸
弟出遊嬉獨把書不置既通大義先祖以律學授之即
能下筆條對明究情法已嶄然露頭角衆謂能大其先

業元光初溫國胥公自秦移鎮新衛尚書李特立聞其才由州戶曹掾辟權行部令史時上以御馬賜國公國曹取芻粟比內廐例先君曰不可在閑則路馬旣賜則公乘內廐之例容得同乎公聞之曰王掾愛人以禮二年上黨公闔壁馬武京為河朔藩扞分羸兵四千人假食於昨適公儲亦無幾方風雪寒沍衆待哺問井間公府議省以聞先君進說曰張糾合義兵皆河北遺黎今飢若是不權宜以濟殆非從便副上官意也侍郎梁亨

道為肯首然當若何曰今官義兩軍溫飽有日若以月
給權輟半以應彼急河南漕粟計不時亦至如此則客
主兩不失所行臺可其請孱兵賴以安活自是大為省
叅康塘郎中盧芝

塘字良輔芝字建瑞二人號載吏事

所賞識曰會是驥

足騰驤一日千里也正大四年用元帥完顏公

諱額爾克德濟

字火燎之號火燎

薦拔所能試京師擢吏員甲首時年二十有

六方軍國多故財賦一仰都運司經度實擇才掾集事
即選充運司掾長先君夙夜在公游刃餘裕都漕李公

芳

字執剛承安二年進士號精政務

同漕移刺吳和深加器重

吳和中公字景

先亦蒙官

入作司藏吏以計盜官物使高世英受贓初不知

從來事覺吏逃失所在及科罪從事帥肅執以監主為
罪首抵世英死先君爭之不下至詣憲部詰辯曰原世
英情本非同謀第行盜後受賕耳據法議罪與原謀共
犯不同高止合坐贓論且法者固當公共師舍焉以即
汝心是置法為虛器上官矐之高竟減死論后懷金來
謁先君怒斥去曰毋污墨我所爭者法非汝私也豐衍

庫使劉濬

字德源愛民榜進士先君嘗從問學以卒初業

以汧代不審陷名紙

三十萬用是追解先君為申理復官如初五年補睦親

府掾屬皇兄荆王判府事愛其德度深加禮遇明年秋

皇太后崩制袒免親奔訃有遠邇之限違者從府科罪

時有後期者先君請曰南渡來宗室播弱宜從寬宥王

然之以為知禮園陵禮畢卒無有被劾者六年轉補戶

部令史時簿書財賦委積

音清

紛至先君精力過人故務

愈繁志愈明氣愈厲事愈詳不煩書佐裁決如流於是

風動臺省有快吏元康之譽開興初用入粟例補滿授
戶部主事壬辰天興東狩崔黨往往入宮禁竊取金貝
或堅約同往以遜辭免乃切嘆曰端門不忍過其忍聞
此京城下將士爭入俘掠尋有令禁止先君偕同志者
突冒兵威褫救百餘口於南薰門下乙未歲北還淇上
尋朝廷命斷事官耶律瑪努勒公括諸道戶口柄用顓決
得人為急用薦者署行臺從事制以籍為定互占它縣
以死論有潞民馬醫常氏避役匿河內王帥家事露公

抵常以死意在籍沒州將且用聳動隣道先君辯之曰
常罪止於逋論死則非制書本意公怒曰脫有誤並汝
坐之反復辯明常竟獲免又王鳳翔者告崔師立弟益
侃匿金國珍寶適萬戶杭實納國闕人受誅公抵益等
以喊失罪罪之先君曰初謀竊者崔立今已死況罪不
相及國有常憲公遂平反為出益等至有圖像奉報之
語明年秋耶律公薨雲中遂南歸或勸為郡縣曰一丘
之木安足棲集乃書歸去來辭於齋壁以見意因號思

淵老人日以經史自娛而尤習春秋左氏傳西漢書晚

年一洗心於易嘗質問於華陰王先生

名元禮天意進士第號王華子

曰子學易當明易理汝知自昔治少亂多君子寡小人衆何也先君曰豈非天一而地二乾陽方始而陰已為之倍歟先生曰子得之矣集歷代諸儒易說為一書題曰王氏纂玄遇朔例一占玩辭明變其應如響下至天文及術數等學皆精習之聞一異書輒自手錄多積至千卷友人劉沖曰何矻矻如是曰吾老矣為自娛

朝夕歲戊戌詔試儒士時恩制寬或以乃嗣長可從師
取試先君曰吾思以義方為訓若以幸竊非常非余所
敢聞嘗誠憚忱曰吾已錯斷不容再寒殍死無掾習能
一志於道以儒素起家吾歿則瞑目矣然學貴專精汝
不見鑑瑩則自能別物學苟不精如治鑑不明將安用
為不學易昧涉世之道不讀麟經無以知筆削之正吾
平昔行已得乎此而已丁巳秋八月以疾終牖下先君
資剛明簡重善持論慮患深雅以大用自期人亦以此

與之握瑜懷瑾羣而不矜事莫可措手者率優為之不
聲色少動故官守宦游莫不尊德樂道問政質疑取決
而去事已率如教至吏筆縱橫緣以儒術乃餘事耳又
善尺牘作真行書勁韻有風格與人交以取容阿匿為
恥居家寡言笑以身為律度人望而畏若一官府然外
事緩急不一言及家人非疾卧未嘗見目而作三十年
兩易裘褐年四十六既奪先妣或勸再娶曰其如不可
何老者繼室又先余死是轉余於恤少者後予是吾遺

累於後竟不娶初試京師時宿院夜夢人奉一首加胄
曰持此若名也及榜出擢甲首云歲丙辰秋憚亦夢人
馳報曰汝父領朝拜旦至趣出顧見先君朝服席帽乘
而秉簡一卒跳梁馬首唱名翠微君節度使后三日先
君遘疾乃以所夢上白曰翠微者太虛之氣夫精氣為
物遊魂為變死生者晝夜之道吾固安之復何憂與明
年捐館吁亦異哉先妣靳氏相州永和鎮人進士子玄
之孫安陽丞顯思之女性淑善於婦道良謹生二子曰

惲曰忱孫振孫宜孫重孫韃郎贊曰

謹按家譜惲六代祖昆弟五人五代祖行一十三高祖行一十五曾祖行一十九王父行一十四禰伯叔六人由是而觀金百年間本支不為微眇然自喪亂來或四三世五六世而已者凡二十有四房哀哉唯扈王氏暨相之醫傳房歷八世而傳祀是豈偶然者哉惲觀西漢名臣往往決曹獄史致位槐棘雖云明習文法練達故實至論身名烜赫胥裔延昌必曰陰積所致王氏自河

平府君而下累葉以力穡承家職司城旦追先考而業
有光子孫迄綿綿於今視履考祥其亦有足致然者耶
烈婦胡氏傳

劉平妻胡氏濱州渤海縣秦臺鄉田家子至元庚午平
挈胡泊二子南戍棗陽垂至宿沙河岸次夜有虎唬然
突來啗平左髀曳之而去胡即抽裝刀前追可十許步
及之徑刺虎劃腸而出斃焉呼夫猶生曰可忍死去此
若他虎復來奈何委裝車遂扶平攜幼涉水而西黎明

及季陽堡訴於成長趙侯為抹藥之軍中聚觀哀平之不幸咤胡之勇烈也信宿平以傷死趙移其事上聞得復役終身嘻胡柔懦者也非不懼獸之殘酷正以援夫之氣激於衷而知有夫不知有於菟也平雖死其志烈甚矣方之太山號婦何壯毅哉贊曰

桓桓壯夫鷙勇而大事出倉猝變色蜂蟄烈烈胡氏憤物為害義激柔衷氣薄於外視虎如鼠所天為大平雖啞死婦節則邁媛折熊衝蘊刃賊輩彤管流徽清芬匪

代

員先生傳

員炎字善卿固州人性落魄嗜酒業詩有能聲不事生
產大元乙亥歲故人楊紫陽主漕洛帥愍其窶用監窩
州酒時兵後邑居榛荒日與鹿豕伍非所樂也已而隨
所徵上謁楊方據按坐堂上吏舄雁行立員挂布囊腋
下杖巨挺直前曰楊使君不相知置我於此幾為老羆
所噬此汝酤錙持取吾不能為汝再辱遂揖而去其疏

誕如此自是長遊河朔以詩鳴諸公間其洛陽懷古分

韻得髮字云東雒打空城北邛連廢闕懷古動悲吟遠

客生華髮隆德宮云林花細妥胭脂色水荇輕淤翡翠

泥歌舞留連嫌晝短樓臺縹緲覺天低譙集東平湖亭

北海樽前人似玉東原城下水如天滿眼荷花三百頃

採蓮人語隔秋烟高唐道中影孤海內干戈滿愁入天

涯草樹低桑柘影空蠶已老陂塘涸盡燕無泥濟南金

線宿雨乍收雲葉斷猶疑電影掣湖心扇尾羊云馮翊

春草香芊綿柔毛食飽飲苦泉卧沙稀肋瓊筋細帶霜
小耳春繭圓扇尾一方移種類風頭萬里搖腥膻吾生
本無食肉相不煩浼予愁烹煎馬酮云漫說十杯不醉
人清光壓倒洞庭春攜行何用紫絲絡渴飲不煩烏角
巾搖動革囊成醞釀封藏花盎作逡巡坐中一混華夷
俗或有豪吞似伯淪予時能憶者止此西歸過衛先君
館焉褐衣麻屨酒近酣巨桴權膝上掉頭吟諷歌謠慷
慨之氣軒軼四座素不能騎衆人強之輒色變墮地或

以詩戲云靴有銓青雖可愛面無人色實堪吟嘗懷金
一餅曰鎮心不可以闕此後用以易妾繼為人竊去家
居壁四立餘詩藁酒瓢而已復有擻舉字彥舉亦陝人
面黧慘目光眊眊若有物憑者少為里畱夫初不解文
字一日忽能作詩吐奇怪語皆古人所未經道雖苦無
義意其豪侈之況儕輩屬和終不能及中元冬見予於
燕市酒樓浮大白數行徑出步爐間嚶嚶然忽作露蚓
聲竟前來扼余腕忻甚曰吾有以贈子其詩有氣凌太

華五十仞詩繞國風三百篇之句醺酣中惜不全憶也
嘗謁得楮幣若干醉過里井即投其中曰為爾俾予區
區若此奚用為其狂易如是後客死保塞殯西南門外
路北若干步揭曰詩人撮某墓詩三卷號谷道人集好
事者刊行於世

墓誌銘

金故忠顯校尉尚書戶部主事先考府君墓誌
銘

先府君諱天鐸字振之族王氏其先陳留郡陽武縣七
園里農家避靖康亂徙居衛汲縣長樂鄉遠祖有積勞
官杞縣尉者曾祖府君諱仲英特有威望終河平軍節
度府都目官祖諱經未仕天性孝愛鄉黨化其德顯考
府君諱宇衛州刑曹孔目官精明文法表表為吏學師
官至敦武校尉先君少聰敏嗜學不為羣兒嬉讀書通
大義先祖授以律學即能下筆論斷推原情法閭閻如
老成人衆謂父良為教子能世其家矣正大初自州戶

曾辟權行部令史時哀宗以御馬賜行省英公圍曹取
芻粟欲內廐例同先君曰在閑則路馬旣賜則公乘內
駟之例非所敢知公聞之喜曰王掾愛人以德矣上黨
公闔壁馬武京為河朔聲援以餽餉不繼分羸卒四千
假食於昨適公儲亦無幾部議以省聞方風雪寒沍衆
待哺閭井間先君進說曰公府糾合兵力皆河北遺黎
今飢若是不權宜以濟殆非從便副上官意也侍郎梁
亨道為肯首然當若何曰今官義兩軍溫飫有素若以

月給權輟半以應彼急河南漕粟計不時至如此則客

主兩不失所可其請孱戍賴以安活自是為省叅康塘

郎中盧芝所器識曰會見駿足騰驤一日千里也正大

四年用元帥完顏公薦拔所能試京師擢吏員甲首時

年廿有六方軍國多故經費一仰大農調度即選充運

司案長時李乾州芳

永安二年進士字執剛

移刺吳和領漕計號

精吏務先君夙夜盡公審會明當二公稱其能入作司

吏以計盜官物使高世英受賍初不知所從來事覺吏

逃失所在及科罪從事帥肅執監主為首抵世英死先
君爭之不下至詣憲部詰辯曰原世英情本非同謀第
行盜後受賕耳據法議罪與元謀共犯不同高止合坐
贓論且法者固當公共師舍焉以即汝心是置法為虛
器上官避之高竟減死論后懷金來謁先君怒斥去曰
毋污墨我所爭者法非私汝也豐衍庫使進士劉濬以
訟代不審陷良紙三十萬是用追解先君為伸理復官
如初五年補睦親府掾屬皇兄荆王判府事愛其德度

深加禮遇明年秋皇太后崩制袒免親奔訃有遠邇限

違者從府科罪時有後期者先君請曰南渡來宗室播

弱宜從寬宥王然之以為知體園陵禮畢卒無有被劾

者六年轉補戶部令史時簿書財賦委積音積紛至先君

精力過人故務愈繁志愈明氣愈厲事愈詳不煩書佐

裁決如流於是風動臺省有快吏元康之譽開興初用

入粟補滿授戶部主事壬辰天興東狩京城下將士爭

入俘掠尋有令約束先君偕同志者突冒兵威褫救百

餘口於南薰門下既而北還鄉里乙未歲朝廷遣斷事
官耶律公括諸道戶口柄用專決得人為急前省掾季
禎已佐幕府薦先君於公曰王某予弗及也遂署行臺
從事戶制以籍為定互占他縣者以死論有潞民馬醫
常氏避役匿河內王帥家帥名資榮事露公抵常以死意在
籍沒州將用聳動隣道先君辨之曰常罪止於逋論死
非制書本意公怒曰脫有誤並汝坐之反復辨明常竟
獲免明年秋瑪努勒公薨雲中南歸讀書養晦以厚所待

或勸治生曰非予初心也勸仕州郡曰壹丘之木安足棲集日以經史自娛尤嗜春秋左氏傳西漢書其天文術數等學皆通習之年既加一洗心於易嘗質問於王

華子

先生名元禮華陰人從衆進士

大有所得一日先生發問曰自昔

治少亂多君子寡小人衆何也先君曰豈非天一而地二乾陽方始而陰已為之倍歟王華子曰子得之矣集歷代易說為一書題曰王氏纂玄且見吾邈世無悶也歲戊戌詔試儒士時恩制寬或以迺嗣長可從師取應

先生曰以學為利非敢聞命嘗庭訓憚忱曰吾已錯斷
不容再寒殍死無掾習能儒素起家其榮多矣然學貴
專精汝不見鑑瑩則乃能別物學苟不精如治鑑不明
將安用為不學易昧涉世之道不讀麟經無以見筆削
之正吾平昔行已得乎此而已年四十六既奪先妣或
勸之娶曰其如不可乎老者繼室又先予死是轉予於
恤少者後予是吾遺累於後竟不復娶

闕

淵老

人邦君游宦咸尊德樂道問政質疑無

闕

已率如

教丙辰春平章趙公壁以書來聘時已病不克往明年
丁巳秋八月十有八日考終牖下享年七十有六官至
忠顯校尉夫人靳氏相州永和人進士子玄之孫安陽
丞顯思之次女貞靜淑善光備婦道生二子憚忱先卒
用戊午春三月葬汲縣親仁鄉之新阡先妣祔焉先君
資剛明簡密議論長慮惠深雅以大用自期人亦以此
與之握瑜懷瑾羣而不矜至當官宰務人莫能措手者
率優為之不聲色少動外事緩急不一言及家人至於

吏筆縱橫緣以儒術乃其末耳又善尺牘簡而盡書勁
韻有風格作楷字日滿萬聞一異書佔俾如不及多積
至千餘卷友人劉沖見之曰何自苦如是先君曰素無
長物非此無以遺子孫其遠大如此所交皆一時名士
以取容阿匿為恥生平非疾病未嘗見日而作三十寒
暑兩易裘褐居家寡言笑以身為律度人望而畏愛若
一官府然嗚呼先君以刀筆起身垂聲當世於先業為
光大惟其秉彛粹慤思欲克其所未至進進焉不容自

已絕不齒故習一肆於學根極羣經務明大本復旁通
天人之術以濟厥用其修己應時開物成務之志是可
涯際邪然時與命揆壽止於斯不獲卓犖大見於當世
憚等聆風樹而含悽履霜露而興感抱昊穹罔極之悲
也愼想平生鏤茲礦石庶幾慰安神靈永閔窀穸之藏
銘曰

緊扈王氏世業農高曾而下掾習同大風泱泱動南鄘
於爍先子德彌崇一日奮起蛇化龍樹立先業何光融

獄惟平反匪厥躬要以明恕剛而中廷平釋之唐有功
漢二千石世業公剖裁錯節輸神鋒庶幾凜凜德讓風
盧淵日入不可曠布衣歸來默而容春秋大易羅心胷
跡蟠於泥氣則虹冀北一顧凡馬空道雖人弘繫其逢
維弗卒施為世恫兒能讀書亢吾宗白首孰計達與通
閉門蔬水甘長終翠微之居窈以重一債不起胡鞠凶
悠悠大鈞問無從太行西峙泉流東九原盤盤佳氣葱
魂兮歸安此新宮

先妣夫人靳氏墓誌銘

先妣縣君姓靳氏相州安陽永和鎮人永和自唐歷宋
為名縣鴻儒鉅族代櫛比出靳氏其一也家故饒財世
以孝義著聞鄉里祖諱師楊字子玄舉進士有賦聲場
屋間後以恩賜第授彰德府教官金百

闕

丁論人

文之選者殿元為稱首

闕

外祖其季

也為人儀觀秀偉髯滿

闕

喜弓馬

闕

滿經

犬游獵橫漳間有河朔故家豪習嘗官安陽丞生二女

先妣其次也

姨母適李氏令為召居鄉里有一子

既歸王氏先祖時已歿

祖母韓性貞明持門戶益嚴先妣孝養恭順故閨門內
事僅絲髮比不敢專須請之后行祖母以是賢之非大
故未嘗踰外閭姻黨有以合二姓會諸親者先妣與焉
里中諸媼至顧而不知為誰平居課兒輩讀書傍治絲
枲須夜分乃休樂聞古人母儀女誡及善惡興衰等事
怡然有得至寤寐思服旦起愛晴陰問或旱則清凜溢
則擇陰輒愀然不懌曰歲功一失憂有大於闕不然

喜津津見顏色先妣性溫純慈祥居家

闕

容儀無

啞啞言笑

闕

人物不忍少休內外

闕

以厚平生

不能易

闕

物心慊慊惟恐我之

闕

人也世方以服飾

相高

闕

羽耀閭閻甚者託燕游以私謁為事先妣聞而

闕

之朝夕志女功主中饋被服在躬承祀孔時嘗以

事當出乃歸而不自安者移時其幽閑貞順之德蓋可知矣歲戊申夏六月竟以憂勤致疾越明年己酉秋七月廿有九日化於私居之適寢壽四十有五先君識明

達既失內助斷不復娶祖母倦勤稍以內事傳新婦推
氏無取先妣婦道是訓因追悼白汝知醮王氏二十有
五年有子有孫未嘗以主母自居失為婦禮勤已至矣
不獲少慰劬勞而止於斯可勝痛哉嗚呼天道悠悠報
施善人果可必而恃邪故臨終闕

嗚呼哀哉天安

憚可罪而至此極耶追念祖母疇昔之言隱然惻於心
故茹哀銜恤於茲八年至是伸荼毒慰下泉發幽光而
圖不朽宜銘德莫若哀號泣涕以畢其辭銘曰

坤柔之德婉以從健而幹蠱匪婦功伯姬之卒諡以共
淑慎先妣柔所鍾主夫中饋成肅雖春秋承祀被僮僮
善人獲報天乃公嗚呼福壽不一逢歸咎無處恫厥躬
褊祔無憾哀送終萬家之原偃斧封泉流可竭恨不窮
故權左司都事趙君墓銘

君諱謙字和之世為蓋州人中統元祀用薦者言以材
幹補行臺左三房提控令史二年春考政上都與予同
遊居者數月用是情好日洽夏六月闔臺南還君為中

省苛留乃以都司擬之作駐留計君怫然不樂求亟去甚銳事業已不許信宿疽發於腦戶呻吟無聊殆不能堪醫庸藥妄一刺而肆裂越三日予與楊易州恕謀曰常山瘡醫麻澤民今之俞跗也適召至若禱於院使王君儀之可一來救藥凡三往得請踵及門中使趣去之自是內侍不出者幾浹旬後五日夜聞君聲漸嘶報燭起視向壁卧頭岑岑不舉矣比明臭惡達戶外僣從止一老愴慙且愚瞪不知若何訪求知故無一人予惻然

感傷冒臭惡易衣衾視其疾緩急困則對榻衣寢自疾
亟迄蓋棺凡五旦夜得年五十有七實中統二年七月
廿有五也嗚呼哀哉以義以友喪無歸責實在我旣
斂詣堂中請曰吏趙謙以守官客死禮以公給喪郎中
賈君仲明怜之官為賻緡錢千躬為護喪大郡城東門
郊外適表親徐貞者至付之俾輶載歸燕君短小精幹
審於吏計蚤歲從事課府以廉介稱杯酒間言笑啞啞
殊不知為肅慎氏之族也朮甲稱者聲近趙家故以趙

定氏云銘曰

志樂而奚庸氣信而弗窮曾不知安於命而為通也心
與事捩卒與禍違奈何乎趙公

故南塘處士宋公墓誌銘

并序

南塘處士宋公捐館之九年當強圉赤奮若其月建亥
夫人魏氏奄棄榮養仲子繼祖等託叅卿趙君禹卿致
其命來請曰先人墓壙未克埋銘今將啓幽堂祔安妣
喪于柩之左窆有日幸吾子速銘以光此大事某追維

雖尹平生之言重以禹卿孔懷之義勉為次序之公諱
珍字子玉姿秀偉有德度早能詩華麗玄深造理窟散
髮揮塵瀟洒有出塵想故中書令耶律公一見偉其貌
竒其才至贈詩稱與有柱石中原之目遂薦為朝廷侍
從官既而嘆曰吾志在長林豐草間清泉白石金馬玉
堂非所樂也乃辭去中舍復授以資使職亦不就歲甲
辰自雲中徙家燕都得金溝水南形勝地十餘畝疏沼
種樹中構堂曰麗澤碧瀾秀挺景氣二勝日以琴書自

娛教子孫為業野服高閑漠然以世務不櫻其懷然性

喜賓客樂觴詠所交皆一時俊人如王慎獨之愷悌張

隣野之諧傲蘊藉如楊西庵才鑒若姚雪齊王鹿庵之

品潔一世商左山之凝重朝右每光風霽月過其居者

燕樂行行必極歡而後去太史公云視友知人公之行

已槩可見矣夫人魏氏有賢淑行輔承內治能遂公初

心四子幼服庭訓皆賢孝負藝學長曰紹祖少中大夫

河南府路總管次繼祖不仕次光祖侍儀法物庫使次

仁祖以琴阮供奉孫十人曾孫四女孫一十四人時節
賀慶蘭芽玉樹瑤環瑜珥秀映庭戶以次列拜上酒介
壽公與夫人亦舉觴酬酢一家之內樂融融也公以至
元己巳秋八月考終牖下春秋七十有七越明年庚午
冬葬大興縣招賢鄉之南原夫人之歿實至元十四年
冬十月廿五日也壽八十宋氏上世大蜀成都人遠祖
有官吉州之吉鄉者遂為河東人曾祖元祖信考章俱
有儒行不耀其幽光潛德發於公之身者宜烜赫然公

復謙抑不盡享其篤祐遺其子孫至光盛如此銘曰
名籍朝端身心考磐貞不絕俗道出夷惠之間以儒雅
而擅一時儋天爵而享高年服食華鮮子孫滿前飄纓
若綬照耀後先沒而從祖是之謂社全我銘納壙復慰
下泉千年而見白日尚知為青山白雲之僊

大元故蒙軒先生田公墓誌銘

金源氏踵唐宋舊制以舉業取士號稱文武正科大定
明昌間人材輩出天下英雄盡入吾彀中南渡後境壤

感時事艱其自淵源見聞中來者多憂深思遠忠義奮發懷赳赳干城之況其風聲氣習歌謠慷慨而有故家遺俗者哉公諱文鼎字仲德姓田氏其先世京兆醴泉縣人曾祖俊正隆初董升宮役因家太康之侯陵祖秀徙居蒙城遂占籍焉祖用御史君貴贈上輕車都尉雁門郡開國伯妣尹氏贈雁門郡君父芝貞祐二年進士第官至嘉議大夫鎮南軍節度副使資雅重有相望妣楊氏雁門郡君公生而爽朗稚時已軒露頭角棖觸物

論為奇童嘗問學燕山張公一見即以不羈許之為人
有膂力善挽強汴京受兵得請於香林先生應募自効
執政以公書生年少初不之意及觀其拳勇試以方畧
詢之宛如宿將射敵慮無遺策以勞授武節將軍西南
面元帥府總領仍佩金符以寵異之京師飢遣公將五
百人取封丘麥既還去城遠條千騎來襲衆欲鳥獸散
公曉之曰彼騎我步若前遮後蹂逃將安之即分為二
隊相去各里許結陣而待戈矢外翼負者居中轉戰轉

退首先作氣敵巨測不敢追比至城下不亡斗麥一卒
執政才其為命監鄭門前後出活飢民甚衆汴梁下縱
民四出護二親北渡時同發者數百家奉親外救死問
疾往來保庇不少倦如渾源劉祁母沮母病死半塗
二子相顧號泣而莫之何公為死瘞生負兩皆得所其
處患難中自掄不暇能急人之急如此何義烈哉遂來
居相下以養親讀書為事負米負薪日供所需以盡子
職既而應廉訪劉汝翼辟為幕寮官時朝廷遠駐龍朔

凡上計三往返事集而無難色歲壬子輔國賢王定封
彰德為分地擢用賢雋特授公為本道課稅所經歷時
持政者多不法公諫止不從即投劾去後果敗中統初
又為叅政商挺辟署河東行臺幕屬無幾罷歸公少負
氣挺節持論高料事明義之所在勇于必為自視以為
一世奇士幅巾藜杖掉頭吟諷不知去古為遠邇惟其
學高六藝名重一時邦君時相爭以禮幣招致尚期有
可為而為之者然以資性太剛又不屑取媚於時故其

抱負治具竟不百一試晚節與西巖張豸緱山杜瑛以詩酒自娛不復談經世事矣臨終語其子復曰士之出處莫非義命道行志通伊周不為之泰道窮志湮顏原不為之否從古迄今有才不遇竄死溝壑者豈獨予哉是非所當戚戚於吾衷也蒙軒其自號云公善作詩工書學趙麗有楷法至於丈尺大字尤極精妙云癸酉春二月七日以疾終廣川客舍享年六十有三夫人慶陽李氏系出唐薛王前進士司農丞無黨女恭儉淑善母

道光備教子孫有法白首一節安公之貧後公八年辛巳歲亦二月七日終於家壽六十有八生二子一女嫁士族子復傳家學有詩聲終河間漕司從事衍富文學通吏事由憲臺史轉補中書令今為禮曹主事庶克光紹遺緒云孫六人曰伯耕曰叔耘叔耨叔耜曰重曰某行將以年月日舉公柩葬彰南新鄉再拜來請銘某雖後進嘗獲拜履綦知公為頗詳旣序其行已敢以生平底蘊未克展盡為士論所痛惜者銘之銘曰

士貴尚志趨事赴功況作而行之迺士大夫之所宗矯
矯田公繫時之雄振靈修之遠駕思從事而匪躬文章
足潤身之具才武是將領之風桓桓蔡挺明夫戰攻解
臨機而制變張國威於小戎奔走急難笑談折衝朔漠
三往冀羣一空顧曷職而弗辦曾漕計之是供政不我
俾坐困簿叢寧窘澗阿肯與彼同利器百而不一試在
先生為不逢道義蟠胷伊周是宗旣得喪之不我與吾
何為而戚乎衷有軒曰蒙獨善固窮閉戶讀書飲水長

終人邪天邪問大鈞而無從惟子孫之可卜見德澤之
所鍾繫臺閣之就列蔚珪璋之顯顯洄流忠北太行之
東雖高深兮易位尚知為蒙軒先生之封

故正議大夫前御史中丞王公墓誌銘

并序

至元二十六年二月丙辰夜刻正議大夫御史中丞橫
海王君以疾卒於私第正寢斂有七日其子庸彛輩縗
服纍然持事狀百拜以壙銘來懇以義以分有不得辭
者公諱復字子初初名趾麟伯其字曾祖瑜大父松世

家滄州俱隱不仕禰府君諱昌齡金季嘗遊宦河南大
梁亡起從恒山史侯叅議軍府事後以公命來攝衛州
事有惠化於民惟君器識早為經畧公所知己未冬自
齊經中起君襲父職仍領州務明年中統建元陞授衛
輝二府同知又明年易州兩路就陞貳總尹君遵守成
憲越先正有光至元甲子轉官制行授朝請大夫改倅
彰德路無幾以德望入為中書兩司郎中調議密勿宰
相至以佳士上聞魏河朔鉅鎮吏重而俗囂號難理特

輟君以少尹來治迺曰清心不如省事省事莫若先殺
吏權於是汰冗濫屏姦惡絕私謁尚德化民有李氏者
珥筆構黨持短長嚇官府張甚君發其姦杖跽之萬喙
稱快自是合郡向風書葉翻香曹務為清簡八年辛未
春自中書舍人出知歸德府府居河下流其秋水大至
環城為海衆胥沈為憾君乃督權師浮舟楫濟民於丘
陵林木上遂相水衝循橫堤疏二渠一注汴瀆一達河
故道水隨退得腴田萬頃佃貧民仍請廩粟得萬五千

石活飢殍者旣而復捷治回龍堤葛邑堤於府西以絕水患曰烏可使吾民重漬於泉故水去而民益親繼丁母夫人憂去職未期詔起君充河南道宣慰副使國家方有事襄漢順流以成破竹之勢故百需百色羽書交督急於星火一責於我中間籌辦君力為不少時大軍復東掀五河戰力而餽乏河走陵蔽川不易轉致衆艱於行君毅然以漕事自任至撞冰東下一夕凍歛解軍威藉以振衆且服君事不辭難而害不苟避有如此者

明年超擢陝西四川道提刑按察使尋進拜嘉議大夫
行臺御史中丞用膺才選既署事有告蘇州應草竊以
城叛者或議調急兵徑討公曰維揚去吳纔三百里不
當猝有此變恐儉人流言激之閔乘間以利賄耳與省
議合遂駐兵近郊偵其實繼發未晚已而果如料吳人
得無虞而妥其臨大事處置明審例如此淮甸沃壤千
里公於上前論奏宜設農司募游食者開耕屯以盡遺
利若爾非惟實內地且威惕遐陬坐銷外侮遵其議付

有司施行俄加正議大夫徙按河東山西道以事免歸

居三年竟以疾縛之遂至於斯哀哉享年六十有四前

後寵錫凡十有一命官極通貴哀榮終始不為未遇以

是月壬申葬汲縣親仁鄉王尚里禰塋三昭首穴夫人

夾谷氏前公卒再娶夫人秦氏生二子曰彛曰範範前

公九月暴卒二女長歸徒單衍闕次適趙常白夫人杜

氏生子曰庸曰子度二子並愿而有文學皆公所自教

云曰女壽適陳氏皆先亡孫二人曰青牛範之子一在

祿公為人器量弘深有經史學善持論識變通無贅言
居養甚重周防甚謹及開物成務當其可為推致所學
惟恐不臻於極然事無巨細率以大體中持恥近効取
譽所謂以道事君者近之至威儀柔嘉小心式訓又類
夫仲山甫衛武公之行已承旨鹿庵王公人品清峻慎
許可嘗有詔詔公舉可執政者迺以君名進奏其經濟
德業可知已初官河東時憲府爭索隱幣以副上需分
司者不計應否悉掩為已功弊久恬不為怪至是公以

前行没入十萬餘緡盡給之民又平陽府胥有以母喪甫
寔輒從吉執役者公曰忘孝之人胡可與處迺按而斥
之其惜體正俗又如是可書者尚多惟著其繫夫事之
重者恐亦公之志也歟銘曰

大學為道將何為俾明一德新民彞行焉而底善是依
要本乎治先修齊俾明厥休用或違其在孔學非吾知
倬哉王公天秉岐自稚細行初不遺若考翼事子肯基
一日雲廈盾巍巍揚歷中外厚自持柔嘉維則非公誰

又復當用行不疑翰音登天翅屢垂越若有物中繫維
從心罔單體非羸期于俯仰無忸怩人或咨惜我獨熙
以道事君其庶幾六十四載麟儀儀綬何若兮印何纍
賁夫松檟餘光輝天其或靳將後貽俾為清廟壁與圭
奉之天門光陸離仙山東麓朝氣霏佳城鬱鬱君所歸
歿而徙禰為受釐足慰下泉含笑嘻零落不必西州悲
我銘昭昭惟昧詒

秋澗集卷四十九